

靜

志

居

詩

話

靜志居詩話卷二十二

秀水朱竹垞先生著

扶荔山房編

朱茂暉字子若萬歷末補秀水縣學生天啓五年

承祖蔭授中書科中書舍人有晦在先生集

崇禎戊辰先君於湖上觀毀逆奄祠作詩紀事時年三

十有一先是河南道御史廣州梁夢環羅織朝士之不

附己者先大父會官工部營繕主事以先太傅喪奔回

籍尙未起復夢環誣奏下法司提問會思陵御極先大

父入都上疏自訟獲免西湖毀祠之日正先君憂患之

餘也逆祠之建始浙江巡撫桐城潘汝楨擇地於關莊  
 繆岳忠武雙廟之間祠成聞于朝賜額曰普德由是封  
 疆大吏尤而效之清苑閣鳴泰巡撫順天總督薊遼保  
 定軍務於所部建魏瑞祠七所天津則巡撫永城黃運  
 泰長蘆則御史合肥龔萃肅薊州則巡撫杞縣劉詔保  
 定則巡撫代州張鳳翼房山則部曹何宗聖蘆溝橋則  
 工部主事臨川曾國楨宣府則巡撫蒙陰秦士文南直  
 隸蘇州則巡撫遂安毛一鷺巡按蘄州王珙揚州則巡  
 鹽御史藁城許其孝巡按莆田宋楨漢淮安則總督漕

運戶部尚書濰縣郭尚友徽州則知府祁縣顏鵬應天  
則指揮李之才山東濟寧則總督河道工部尚書南樂  
李從心德州則巡撫潁川李精白登州則巡撫滎河李  
嵩山西大同則巡撫魏縣王黠代州五臺山則總督閩  
中張樸巡撫興州曹爾楨巡按臨邑劉宏光河東則巡  
鹽御史縉雲李燦然河南開封則巡撫大名郭增光巡  
按餘姚鮑奇謨參政海寧周鏞祥符知縣泰興季寓庸  
陝西延綏則巡撫萊蕪朱童蒙固原則巡撫武定史永  
安湖廣武昌則巡撫慈谿姚宗文巡按東莞溫皋謨至

都城內外建祠尤多勳臣則保定侯梁世勛博平侯郭振明武清侯李誠銘詞臣則庶吉士大興李若琳臺臣則日照李蕃廬陵黃憲卿壽張王大年旌德汪若極平定張樞河間智鉉府尹則陽城李春茂餘若主事張化愚上林監丞張永祚爭先營建六街九衢祠宇相望有建于內城東街者工部郎餘姚葉憲祖私曰此天子幸辟雍馳道也駕出土偶豈能起立乎偵者以告忠賢卽日削其籍祠以闕麗相尙瓦用琉璃像加冕服有沉檀塑者跟耳口鼻手足宛轉一如生人腸腑則以金玉珠

寶充之髻空一穴簪以四時花朵其褒頌之詞有日至  
聖至神中乾坤而立極乃文乃武同日月以長明每建  
一祠必以上聞閣臣輒以駢語褒答尤悖逆者國子監  
生陸萬齡以忠賢頒要典比于孔子作春秋忠賢殺楊  
左周魏諸公比于孔子誅少正卯請建祠國學之右與  
先聖並尊會愍皇帝晏駕乃止而江西巡撫益都楊邦  
憲毀周程朱三賢祠兼奪澹臺子羽祠碎其像於思陵  
卽昨之初仍疏請建魏逆祠思陵闕之微笑忠賢乃具  
疏佯辭帝輒報允及忠賢誅諸祠悉爲士民所毀凡建

祠者盡入逆案額名可紀者有永恩感恩祝恩瞻恩普  
德彰德顯德懷德昭德茂德戴德瞻德崇功報功元功  
旌功懷仁崇仁隆仁崇勳茂勳表勳德馨鴻惠隆禧其  
餘難以悉數矣先君好博覽經史之外諸子百家靡不  
兼綜性樂取友海內文彥過嘉禾者必盡款曲古文辭  
源本六藝韻語不屑蹈襲前人尺牘日可百函華亭周  
勃尙嘗云讀書能化臭腐爲神奇惟禾中朱子若有其  
法所輯禹貢補注徐孝廉闇公謂當與程泰之傅同叔  
並垂復社第一集同盟奉爲倫魁申酉以後遞荒謝客

晚歲失明猶命童子誦書不輟云

錢秉鐙字幼光桐城人後更名澄之字飲光有藏

山閣彙田間集

幼光禁罔潛蹤麻屨間道或出或處或嘿或語詩屢變而不窮要其流派深得香山劍南之神髓而融會之錢氏錄其作入吾彙集蓋深取之矣昔賢評陶元亮詩云心存忠義地處閑逸情真景真事真意真田間一集庶幾其近之效淵明飲酒詩云寄生大塊中何者爲我故譬如逆旅物暫有安足據在世雖百年畢竟舍之去臨



去豈不戀戀亦不得住所以達觀人澹然隨所遇委順  
生死間不厭亦不慕日飲一杯酒可以全此趣宣聖防  
酒困周易凜瀟首但云不知極其辭亦無咎大哉二聖  
人未嘗斷我酒如何學佛人不許杯入手還言破此戒  
諸戒亦難守我心任自然本無戒可受方其酣醉時虛  
空一何有試問學人心有能如此否芸芸萬物化各各  
復其根其根果何有出入豈有門昔人推太極無乃荒  
唐言吾生本無受沒去亦無存于中何所見而辨明與  
昏不如隨衆人與之同渾渾人生求有道仁義固其端

吾不知仁義惟求心所安仲尼困陳蔡微服亦不難登  
壇却萊夷鋒刃還相干豈不惜軀命道在志以殫吁嗟  
保身語徒爲後世寬水仙二律云莖葉盈畦短根芟與  
石宜素華疑雪片絕豔是冰姿影在燈前好香惟夢醒  
知神清誰得似姑射耐寒時千葉殊濃豔吾憐六瓣單  
香中稱澹妙花裏最清寒白映湘妃珮黃加道士冠常  
防酒氣逼不敢醉時看

顧絳字寧人崑山人後更名炎武有亭林詩集

寧人早年入復社與同邑歸莊齊名兩人皆耿介不混

俗鄉人有歸奇顧怪之目兵後盡鬻其產寄居章邱別  
治田舍久而爲土人攘奪乃又遷于山西營書院一區  
盡取家中所藏十四經二十一史暨明累朝實錄插籤  
于架予嘗分書題其柱云入則孝出則弟守先王之道  
以待後學誦其詩讀其書友天下之士尙論古人然僑  
居日少暇輒周覽山川考古今治亂之迹證以金石銘  
碣著書盈麓其卷帙最繁富者肇域志也寧人沒後遺  
書悉爲弟子吳江潘耒刊行獨肇域志散佚良可惋惜  
詩無長語事必精當詞必古雅杼山長老所云清景當

中天地秋色庶幾似之龍門云亘地黃河出開天此一  
門千秋憑大禹萬里下崑崙人廟熬蒿接臨流想像存  
無人書壁問倚馬日將昏嵩山云位宅中央正高疑上  
界鄰石開曾出啓嶽降再生申老柏搖新翠幽花茁晚  
春豈知巢許宿多有濟時人劉諫議祠云阜囊青史漫  
傳名白日黃泉氣未平自古國亡緣宦者可憐身沒尙  
書生荒阡草長妖狐出舊驛風寒劣馬行一自德陵升  
馭後山河祠廟總淪傾

張綱孫一名丹字祖望錢塘人有從野堂詩集

秦亭論詩謂少陵七律能用比興他人雖極工鍊不過賦爾以是人皆賞其七律然不若五古之波瀾老成也其南北行旅諸篇尤爲奇崛方之西陵諸子逸倫絕羣哀舊廬云朝出西郭門一步一徘徊道逢舊鄰里問子何所之子亦無所之將往北山陂五世爲君鄰一朝俱遷移兄弟皆分散妻孥何所依矧復幼子亡棄置在路岐頃從家中過不知有阿誰蘭桂摧作薪空餘零露垂風雨日飄搖棟宇莓苔滋念我平生居涕淚不可揮武康縣云羣鷺起平田衆流匯大溪離離樹影出團團雲

色迷我行防風國麻鞋踰弱泥山縣習俗古二豸五母  
雞尙有先民風桑陌陰依依日中市已過居人閉柴扉  
魚跳花下浦雉飲竹間谿及此暢懷抱恨爲俗士攜涿  
州城云曉霜不在地微白生牛背遙望涿鹿城隆隆沙  
磧內控縲走其下壁立皆土塊此地古范陽甲兵天下  
最側耳聞啼饑傷心自我輩野狼遇人嗥蒼鷹攫雉碎  
生涯底如此浩歎茲行邁督亢陂云已過許氏里  
路有許善  
心故迢遞出燕關南有督亢陂沿河路迴盤四望棗樹  
林霜葉亦已乾土闢又沃美彷彿畫圖間始知荆軻謀

不成良足歎秦皇雖不死白日爲之寒俠烈槩千古哀  
哉太子丹再越白溝水層冰凍漫漫兩兒戲其上投石  
笑我前我生不如子辛苦損坐鞍人從土壁行鳥向平  
蕪還高陂下牛羊淺浦無波瀾不異故鄉適惟見暮雲  
殘臨風幾回首去去心悲酸

魏璧字楚白慈谿人崇禎中補歸安縣學生後更  
名畊字白衣有息賢堂前後集

白衣僑居吳興別鮮山爲晉沈禎沈聘避地所居有渡  
曰息賢遂以名其堂其論詩云詩以達情情貴極其所

至故樂必盡樂哀必盡哀由唐以前諸家體不必相蒙  
而其爲至則一也學者各盡其塗徑而入入之愈深見  
其畛域愈廣恣睢淫佚于其際者久之乃始得其澹澹  
之樂故涉獵衆家不若專致一家一家之趣旣竭而後  
馳而去之再適一家其於一家猶是也然後古人之長  
見而我之長亦見余之於詩初無矜飾務達其情凡博  
奕飲酒朋友酬酢以至山川風俗城郭之所歷覽遺迹  
之所辨證雜然前陳有觸于懷發之詠歎以爲合於作  
不能自己之旨此則余之所自道已故其中年專學子



美末年專學太白惜乎未見其止也日出入行贈鎮江  
 潘陸云白日如金盤迢迢轉青天夕沒虞淵朝復出苦  
 爾獨照羈人顏我欲長繩繫其影誰能上結高高之青  
 天下結冥冥之重泉春花吹落斷腸去秋霜蕭颯不可  
 言我與汝曹日奔走茫茫赤縣疲人間才大世人皆欲  
 殺七尺之軀那值錢潘江如聽我言萬古文章置高閣  
 青蚨須索五十千天台瀑布插眼前潯陽酒樓宜酣眠  
 那待好鞍與好馬纔指五嶽拂長鞭海上白龜橫鳥去  
 倏忽已過三山巔金宮玉闕霄漢間直與東王西母筵

范路字遵甫蘭谿布衣流寓嘉興門人私謚貞簡

先生有集

遵甫含貞履信博通古今賣藥市門行歌帶索由其見  
深故於憂淺識遠斯視患浮昔人謂太邱道廣廣則不  
周仲舉性峻峻則少納遵甫廣不混俗峻不污物發爲  
詩文多見道之言裴子野之稱劉居士也所修孔氏之  
學則儒者師之所明釋氏之教則淨行傳之所著文集  
則詞人錄之斯言也遵甫庶足當之矣讀史云智伯祀  
已殄趙氏勢方雄士苟欲富貴匍匐歸其宮飲頭諒不

活殺身亦何功哀哉漆身人甘以殞厥躬乃知國士心  
不與世俗同寥寥數千載誰能嗣其風

附錄周青士云遵甫潛心性命之學不關佛氏偶然  
作云青青江岬山活活江流水夫豈不高深有象終  
必毀又云我嘗夜分坐仰天見北斗風吹百草頭月  
出萬山口牧雲和尚愛之欲付以巾拂不受海鹽張  
處士瑣白方講學硤石山遵甫謂其晰明德格物義  
有未安別爲講義示學者人或以其未盡合乎朱子  
非之遵甫不顧也其詩不費鍛鍊而出誦之妍雅和

平晚開靈蘭館賣藥長水市乍愚乍智人莫測其所  
詣云 錢爾載云遵甫孝友性成自其父徙居梅會  
里父母既沒以不得反葬蘭谿時時銜恨崇禎辛巳  
禾中歲大飢人相食有族弟恩攜妻子鬻身以求活  
遵甫留之同飯糠粒怡然不以爲嫌此事人所難能  
也遭亂賦詩云東去大海一千里赤脚踏著珊瑚枝  
足稱警句

韓洽字君望長洲人隱居羊山有寄菴詩存

崇禎之際言詩於吳下吾必以君望爲巨擘焉匪特高

節軼羣也所撰篆學測解釋訓考源足證說文長箋之  
誤野田黃雀行云每每野田廣習習雀聲微飲啄豈或  
異性情能不違翔集繞溝畎樂我禾稼肥禾稼雖未登  
西成今庶幾皤皤野田叟羸拙無俗機猜嫌兩不作相  
向心依依有時爭隴行先我後我飛農望甌石儲餘粒  
雀所希同在田中生安知是與非躡帆行云舟之有帆  
檣本爲順風設逆風亦張帆湖船技獨絕逆來以順用  
其妙在曲折峭帆必斜張左右隨所批旋轉分寸間向  
背遂迴別風來雖當頭我舟顧斜掣轉側以背承風過

自後撒帆勢從風歛船舷半沒滅所恃旁版垂故不至  
橫截斜行旣良久轉踰柁旋捩其塗稍紆回其勢已飄  
瞥小水難迂行拘于勢狹劣大海太渺茫回旋恐無節  
惟湖旣開廣諸山復睂列是法獨可行雖險無碗艤我  
來包山游其事始親閱巨舟數播蕩狂濤湧如雪同行  
未習見驚怖膽欲裂我心自恬然壯觀殊可悅古來處  
橫逆濟險賴明哲遙順無力爭所志終必徹屈曲委蛇  
間大巧固若拙利觜蠅云永叔賦蒼蠅具言可憎態猶  
幸無利觜不爲人所畏不知蠅之中別有利觜派蜂蠆

雖有毒遠之斯無尋蚊蚋雖侵人扇撲亦一快今此利  
黃蠅罪甚蚊與蠶其喙如鍼錐其性復狡獪忽去倏而  
來掩手不能逮平生未嘗聞乍見頗疑怪蕘豎向余言  
是物出牛穢脩農與倦牧一見輒飽嘬譬諸蛇虎然第  
爲山澤害君胡遠市塵曠野近此輩我心豈豎知聞之  
發深慨雪裏紅云籬落徧積素愈知顏色丹故非嘉卉  
列聊作野花看天道存微物韶華惜歲闌勞心良獨苦  
誰謂不知寒詠鐵馬云急響中宵發凌空鐵騎行不知  
風信至頓使旅魂驚當世正多事吾儕方苦兵那堪簷

字下又作戰場聲張良椎云一擊或幸中扶蘇作天子  
劉項雖亡秦未必速如此

王錫闡字寅旭一字昭冥吳江人

寅旭博綜羣書尤精歷象之學創新法候日月食較密  
于前人撰有歷法歷說大統歷啓蒙解圓三辰儀晷諸  
書爲人耿介拔俗詩亦不沿時習幽居云北牖微風度  
斜陽意獨醒寒溪沉鷺白夏木挂蟲青理釣竿成曲爲  
農具有經鄰翁尋舊約倚權渡前汀

沈祖孝初名果字因生一字雪樵又字雪漁烏程



人有湖干硯傭當泣陶年吟安下簾等集

雪樵至性之士詩皆從肺腑流出于忠肅墓云不讀先生傳誰知社稷危中原無恙日少保大名垂獨定千秋業偏留萬古悲自來墮淚碣寧上峴山碑蟋蟀云夜蟲啼不已向曉益啾啾八月寒如此終宵恨未休有聲寧待和無力自知愁總值秋風裏何能追百憂無題云相見何由恨亦空畫樓簾卷怕花風枝頭葉葉今朝綠苔上星星昨夜紅西鳥有生多共命春蠶無歲不同功偶然閱罷昆侖傳便欲焚香拜此公

戴笠初名鼎立字則之改今名更字耘野又字曼  
公吳江人縣學生

曼公谷隱巖耕不入城府句如愁邊細雨孤舟遠夢裏  
青山故國春夜雨聲中流水急東風陌上野花開眠鳧  
夢裏誰家地啼鳩聲中故國秋大有孤山處士遺韻

張宗觀字用賓一字朗屋紹興山陰人

朗屋以王霸之略自許與朱朗詣齊名時號山陰二朗  
朗詣坐事繫獄朗屋號呼於所知斂重貲賄獄吏得不  
死既而論釋朗屋聞之大喜踊躍夜渡江爲盜所殺其

詩恢奇磊落樂府古風尤絕倫品獨漉篇云獨漉獨漉

高岍深谷豈不欲渡慚無車軸一解鴻生北野翩翩南翔

悲風四合亂我行藏二解普天同雲雨雪灑灑念我故人

躊躇中野三解天生快馬必有健兒士無知己泣下語誰

四解猛虎在山亦有人行一夫執志七國縱橫

朱士稚字伯虎更字朗詣紹興山陰人門人私諡

貞毅先生存集

山陰二朗具郭景純雋上之才仗劉越石清剛之氣令

假以年直可凌顏鑠謝陳卧子詩云越國山川出霸才

二子咸以管樂自命誦朗詣讀史詩云英雄窮賤盡無策天下侯王自有時慨當以慷不啻擊缺壺口也

吳騏字日干松江華亭人有頗頷集

日干力崇正始其詩沈厚不佻讀史雜詠云販繒洛陽市恒受市賈欺關津征稅重折閱苦不支市籍非所樂况復寒與飢相驅入大澤揭竿爲旌旗從龍入灞上神器忽以移南面據茅土成績銘鼎彝人生非困窮孰能履危機安危在反掌詘申難前期寄言猗頓流終無封侯時塞下曲云固原城郭控西秦遠戍今經二十春家

在洛陽城下住經年不見洛陽人四牡駢駢出玉門詔  
持繪帛賜烏孫爲言侍子今無恙初在京師讀魯論少  
年行云下馬回傾酒一尊侍兒七首劃蒸狔生平不著  
黃金甲醉袒貂裘數箭痕紅玉鞍橋碧玉驄樂遊原上  
柳絲風詔求季布今何處只在三千奴僕中

朱鶴齡字長孺吳江縣學生有愚菴小集

長孺說經鏗鏗長於箋疏之學所撰毛詩通義尙書埤  
傳禹貢箋注左傳日鈔發明宋儒集注集傳所未及顧  
不甚傳惟杜甫李商隱集注盛行於時松陵文獻稱其

遊落世事晨夕一編行不講路塗坐不知寒暑或謂之  
愚因以愚菴自號蓋實錄也廣志詩云溪流湯湯下田  
得魴網苦旣設淵魚知藏黍實離離蒺藜間之阪田自  
美奈何不治蘭艾同榮望秋則囊雖在束薪終是芳草  
日出日人皇皇宮庭含精吐景爰保吾生感遇云薇蕨  
苟可采何必在首陽清流苟可汎何必在滄浪至人處  
委蛇守已非一方直木寧見伐芳蘭寧遂傷縱志游霄  
漢俯仰隨翔翔

歸莊字元恭崑山人有恒軒集山游詩

恒軒好奇世目爲狂生善行草書嘗題其齋居柱云入其室空空如也問其人囂囂然曰鄉鄙傳之謂可入啓顏錄其名字屢更崇禎中忽請于學使者改名祚明自是以後或稱歸妹或稱歸乎來表字或稱元功或稱園公或稱懸弓恒軒其別號亦號普明頭陀又號鑿鑿鉅山人沒後女婿金侃輯其遺詩及文名字一從其舊焉侃處士俊明子能詩畫亦隱居不出

陳三島字鶴客長洲人有雪圃遺藁

鶴客志士所居蓬戶席門而求友若不及中懷孤憤恒

露于眉宇之間其詩初神游于大樽後心折于朗詣華  
整之中間以清商變徵之調惜乎早逝未盡其才盤龍  
云開簾方過錦刻燭進盤龍玉樹低宮月春風度苑鐘  
霓裳昨夜舞垂手昔時容寂寞昭陽殿還應白露濃川  
扇云險絕蠶叢地繇來宮扇傳大都白帝竹盡用錦官  
箋出匣風初轉垂綸月半圓人間遺玉柄猶是漢宮年  
山中逢王雙白云攜筇獨步避青苔悵望南峰烟霧開  
半岫夕陽長笛起滿山落葉故人來天空孤鷺飛橫渡  
日暮飢鷹下戍臺握手相逢難卽別關河此日重徘徊



徐晟字禎起一字損之長洲縣學生有陶菴詩刪  
禎起交情真摯悃幅無華詩皆自道性情雖以陶菴自  
稱不盡規撫栗里秋夜讀書云開秋滌煩疴暫息桐花  
陰抗言懷往昔大雅力不任秉文遡漢魏禁使流俗侵  
古之風騷徒皆知天地心落魄草澤間哀怨遂以深感  
物懷殷憂濁酒聊自斟來者日以促升者日以沉蟋蟀  
鳴我堂中夜起悲音微風吹羅袂明月輝前林先民不  
可作厲志登高岑

談遷字仲木一字觀若海寧人

仲木留心國史考證累朝寶錄寶訓博稽諸家撰述於  
萬歷後尤詳號爲國權中年燬于火乃復沉思強記覆  
閱羣書詢之故老墨枯筆秃不及餐晚克成編南都  
議上景皇帝廟號曰代宗一時以爲當仲木獨以爲非  
有答友人五古云成周作諡法大小行乃傳公旦暨師  
望肇制自聖賢相古后王陟南郊必稱天易名典克慎  
敘法宜精專漢後避帝諱臨文率拘學唐以代易世宋  
以真易元其文雖或殊其義則一焉景皇承大業卽阼  
凡七年多難固邦國文武要略全屢遣奉迎使事兄禮

罔愆及乎裕陵返黃離位南偏初非囚堯城奪門言何  
諠梁瑤策始建張懋冊用宣廟號猶未備何以垂簡編  
禮臣失不學代乃居世先相越僅五世文義詎可沿諡  
說十五家秉禮恐不然盈庭以爲是橫議臣談遷辭雖  
未工有關典故特錄之

沈謙字去矜仁和人有東江集

西陵十子多以格調自高去矜兼采粗于六朝故特溫  
麗山居云昨辭郡邑游歸就田園居早穫旣已畢比舍  
停役車天澤幸不偏大小各有儲蒼茫十月交霜寒林

木疎墟烟暮曖曖落日照我闔牀頭酒應熟喚婦羅前  
除彈我匣中琴讀我枕上書亦知爲農樂富貴復何如

胡介初名士登字彥遠錢塘儒學生有放堂詩集

新安程觀生仲孚奇士也好談王霸之略兼治青烏家  
言其持論謂人家葬吉壤出聖賢者第一其次忠臣節  
士又其次博學就徵以科甲爲最下嘗坐事繫獄嘗論  
辟先君子力救獲免恒下榻寒家學易於蒙難之後平  
生最契合者先君子之外與彥遠稱碩交所載漢唐以  
來易義動累百家同異紛綸條分縷解兩人皆好游亦

皆無子彥遠自河渚徙宅一畝田暇與室人翁少君門  
內唱酬晚逃于禪年未五十而卒其詩不屑效西陵派  
謂吾盡吾意免俗而可矣仲孚有弟忘其名字五經進  
士譚公元孩之客死漳州也先君子請程君入閩扶其  
柩程君許諾先君子坐之堂上行四拜禮程君受而不  
答甫度梨嶺而程君病卒目不瞑予中表兄舟石哭之  
逆旅枕中得先君子書回視君目瞑矣此又一奇士也  
西谿竹枝詞云山行處處曉光開十八溪邊載舊醅有  
屋盡從梅裏出無泉不自竹邊來溪上女兒鬢蓬蓬鬢

邊滿插映山紅逢人問路公然應指點前溪東復東郎  
住前溪妾後溪采茶生小慣相攜月明各自提筐去一  
縷茶烟隔竹西

陸啓滋字叔度平湖人貢生有貲趾山房集

叔度論詩以杜陵爲圭臬然大陸才多少枚賦敏酒酣  
擊盃與會所至累牘連篇亦不復拘格律也性最豪邁  
游金陵大會詞人于桃葉渡妓有呼延紅菊者武安人  
倚船牕謂女伴曰今日之集惜無兩姝芙蓉君乃復治  
具張譙至則晚風拂席荷香襲人四座莫測其故蓋先

一日以善價購得百缸碎而沉之自是十四樓中奉爲  
上客旣而走京師詩名藉甚遇寇亂歸里阨窮而死其  
友趙退之誄曰總君一身頓殊今昔翩翩五陵蕭蕭四  
壁金散名成人完代革聞者以爲括其要云

錢士馨一名軻字稚拙又字稚農平湖人貢生有

麇笱集

稚農韶年儻蕩不羈游白門與青樓妓暱欲挾之歸妓  
日以君之才妾侍箕帚宜也但觀君談論恨讀書尙少  
願以異日稚農恥之還里門假東湖僧舍以居夜讀昭

明文選一沙彌前曰秀才年不爲少矣乃尙讀此兔園冊邪雅農益以爲恥發憤研究經史多所撰述從來說周禮者謂冬官不亡散見五官之中故自臨川俞廷椿後多以意取五官之屬以補冬官雅農獨据尙書大小戴記春秋內外傳以補之君子以爲篤論晚入燕遇寇變者甲申傳信錄十卷頗不失實平生賦詩無多能遠時習

吳蕃昌字仲木海鹽學生

仲木貞肅次子師事劉念臺先生與海寧陳確潛夫桐



鄉張履祥考父講洛閩之學詩非專務卒時母喪未除  
遺命以衰經殮其從弟哀仲居母憂過哀卒於喪次里  
人並稱爲孝子初夏卽事云桐花初吐燕歸巢卷幔荷  
亭草樹交浴罷清池一雙鶴雨餘斜照滿林梢

金蘭孫字龍友秀水儒學生有鐵巖集

龍友下筆不能自休間有合作正德宮詞云月射廳紗  
映畫梁芙蓉闕北鬱金香西宮今夜停歌舞聞道官家  
宿豹房天啓宮詞云玲瓏玉束繫鮫綃素腕雙擎碧玉  
簫萬壽山頭歌急拍一聲聲唱雒陽橋崇禎宮詞云雉

扇乘雲啓鳳樓特宣命婦拜長秋賜來穀雨新茶白景  
泰盤承宣德甌

李標字子建嘉善人有東山遺橐

子建精於戎機戰略軍律營陣壬遁諸書史閣部道鄰  
僻爲記室見事不可爲返里與魏吉士子一深契當吉  
士公車北上執手河干謂子建曰子夢斜塘見茫茫一  
片土無復雞犬桑麻行後得無有變乎子建戲曰君且  
富貴宜目中無人爾甲申吉士喪車還經斜塘子建撫  
棺曰子一子一果妖夢是踐邪因慟哭失聲旁人無不

流涕繼聞史公殉節揚州渡江會葬其衣冠于梅花嶺  
歸而遶屋皆種梅賦詩三十首蓋自託於西臺慟哭之  
謝參軍云寄懷無塵上人云蒲柳先衰感鬢絲孤蹤不  
定益凄其十年結客家貧日萬里懷人淚盡時渤海波  
深龍卧穩江山秋老雁歸遲長天一望情無極空寫新  
詩寄別離

沈起字仲方嘉興縣學生晚爲僧名銘起字墨菴  
有學園錄續集

仲方質敏讀經不沿傳注每自出意解聞者解頤年近

三十始列青衿有御史某按嘉禾倨坐自尊屬吏皆股栗謁孔子廟舉進諸生講四子書仲方請說攻乎異端義拱而前曰太祖高皇帝曾說此章書御史乃出位旁立鞠躬輟講方坐觀者肅然中年入東禪寺爲浮屠非其好也嘗擬撰明書謂明不亡于流寇而亡于廠衛斷自成化十二年秋始設西廠絕筆焉晚節以窮死

吳系字方輪後更名宗潛吳江人補秀水學生有

東籬野人詩草

方輪兄弟九人兵後存者率棄諸生不就試鄰壤隱君

子相與往還酬和篇章甚富於是方輪輯其詩爲驚隱  
篇方輪弟九畹輯其詩爲歲寒集是亦月泉吟社玉山  
雅集之流也

黃宗炎字晦木餘姚人有二晦山棲集

晦木厭時流詩派之熟專學宋人講易獨開麥輿力辨  
太極圖之非禮法之儒攢譏不顧蓋崛強其天性也屯  
溪至漁亭云竹筏清溪逆水牽魚游常在鏡中天夜深  
孤雁驚船尾日落雙猿抱樹巔九里十灘尤懊惱一程  
五舍尙遷延胡麻赤米邨邨種翻羨山家墾石田

董璫字子長會稽縣學生

子長唐宮詞曾刊入今詩粹及見子長彙本改定云羯鼓聲高舞袖長製成小管自王太真獨愛涼州曲自出金錢賜耍孃覺詞意倍工詩所以貴推敲審酌也

宋用調字子彝紹興山陰人有固亭遺彙

子彝五律原本襄陽太白故以跌宕見長誦之如食哀家梨但覺甘脆七言如古祠老樹寒鴉集官路斜陽牧馬還亦名句也江南曲云蓮葉南塘暗蘼蕪官路齊相逢弄珠客舊識浣紗溪子夜歌初變牆頭烏欲啼莫愁

何處住言訪石城西送陳無名歸暨陽云歸去楓溪好  
千山如畫圖花邊開板屋竹裏見晴湖送爾惜芳草到  
時聞鷓鴣應憐浣紗石酒罷月明孤鑑湖寄錫鬯云烟  
暖紅蘭新鴛鴦飛近人一壺如碧玉愛此鏡湖濱年年  
二三月日日桃花春不減武陵渡欲邀劉逸民

張杉字南士蕭山人有集

南士周見洽聞賦才獨步詩篇和雅無傲志之音苦寒  
行云元冬涼節屆朱方寒氣侵天地自騷屑原野何蕭  
森長晷麗北陸遠颺激中林白日澹無色同雲凝層陰

履霜知冰堅集霰悲雪深空山號飢獸古木喧寒禽但  
聞落箨響豈復流泉音朔風襲阿閣重裘苦難任顧此  
貧居士短褐無完襟慷慨誰爲語苦寒徒自吟

徐白字介白嘉興人徙居吳江有竹嘯菴詩鈔

介白初師景陵詩派務以幽深孤峭爲宗後以太湖落  
日賦見賞于陳卧子晚年持論稍歸和易江上遇亦于  
大兄云百種愁回一寸腸更懼多難又他鄉與君一世  
爲兄弟只是相逢在路旁

顧有孝字茂倫吳江縣學生有雪灘釣叟集



清言 卷二十一  
處士甄綜百家之詩開雕分授盛行于時賓至輒留江  
左有壘菜孟嘗君之目由其胸無柴棘故月旦同辭晚  
自稱雪灘釣叟松陵女子沈關關刺繡作雪灘濯足圖  
一經裝池過江人士以不與題辭爲恨

韓畱字石耕宛平人有天樵子集

石耕善琴所操北音恥作妮妮兒女之語終身不娶游  
覽江湖以終今之牧犢子也五律清穩頗足名家望天  
台云望裏天台近羣峰秀幾重迴看青嶂斷忽有白雲  
封絕壁垂樵徑春泥陷虎蹤石橋今夜月應爲照長松

張蓋字覆輿一字命士永年人有集

覆輿詩哀憤過情五言尤高簡客中送人歸云雲沒青  
山頂風含白岬波離情秋更苦歸路雨偏多小巷臨漳  
水荒林帶女蘿附書愁不達汝到定相過同申臯盟殷  
伯巖諸子集飲云屢宿陶潛宅今來得數公竹斜燈影  
外人醉雨聲中老惜歡娛異交緣出處同病軀先就榻  
應恕鹿皮翁

張家珍字璩子東莞人有寒木樓遺詩

璩子年十六從其兄家玉身歷戎行騎黃馬摧鋒陷陣

馬死璩子哭之慟葬之龍門山中既十年所忽夜夢馳馬如昔悲鳴躑躅覺而爲詩弔之日久失飛黃馬空餘血戰衣可憐橫草後不得裹尸歸力盡猶追逸功高幾潰圍年來生髀肉夢爾淚頻揮

陳忱字遐心烏程人

唐羅隱詩中稱錢鏐爲尙父遐心詩云餘杭山水役精魂末世才人眼界昏憔悴感恩依尙父可憐尙父事朱

溫

談允謙字長益丹徒人有樹護草堂集

崇禎初大官庖開應支物價簿帝詰內侍謂太浮且曰  
炙鵝醢鱗肉鮮在某肆市之錢半百耳內侍驚愕長益  
詩云潛邸曾親到市壓民間物價每流連西華鵝炙前  
門鮮一箸纔消半百錢足以徵思陵留心民事之一端  
也

許友字有介侯官人有米友堂集

先生才兼三絕名盛一時愚山最愛其詩錄之入吾彙  
集要其篇章字句不屑蹈襲前人正如俊鶻生駒未可  
施以鞴勒放鶴篇云予與鶴一隻親厚無間然近日恒

苦饑人鶴兩可憐老僧意惘惘投我詩一篇勸我縱遣  
之俾其返瀛壖予聞情惘默招鶴立於前拱手與之別  
君今得遠遷煩以許生貧試往海外傳長路多增弋君  
當慎弓絃鶴亦白主人世無如君賢予久服馴養多年  
伴林泉聞雞君嬾舞著鞭讓人先獨我霜夜鳴君起聳  
寒肩長吟與予和月落猶未眠前歲有估客自矜多腰  
纏購予以重價不惜費十千意欲媚權貴籠至東廂偏  
主人拒之去義不受一錢齋厨近蕭索休糧信所便不  
願入華亭不樂還青田長依小池曲飲啄終殘年嗚呼

明獨酌圖云黃花初放酒新香門巷蕭然意味長不管  
人間有風雨先生高卧過重陽

孫爽字子度崇德人有甲申以前詩容菴集

子度太湖戈船云嘗讀眉山詩雅羨魚蠻子誰知五湖  
中漁樂乃過此寬如數畝宮曲房不見水雙舫截湖來  
橫網亘數里高眠狎波濤天風聽所止長魚幾人搏尺  
許無足齒鬻賣逐自然通侯富可擬亦有童子師書聲  
到水市衣食既鮮華絃誦恒清美雖有桑大夫差科未  
擾是人生老戈船頭白何須恥子度是作係太湖雜詠

六首之一支或作眾大艚巍峩占湖西石磯自非風動  
天不開也峭帆六七道破浪而行曳巨網於船尾獲魚  
多至千頭東望角里而止不能登岸吳興邱大祐竹枝  
所云郎如湖裏泛鼠船逐浪隨風不到邊是已船人生  
子仍課以書具束修延師白金必三四鎰女子塗妝縮  
髻臂金跳脫拽篷船中雞栖豚柵靡所不有昔皮陸松  
陵唱和天隨自詡矢魚之具窮極其趣竊疑兩公未曾  
覩此其中漁具尙多定不止襲美所添而已

劉雲字師望長洲布衣有劉氏詩存

師望詩體清剛原出牧之東野秋夜讀書云澄懷坐  
夜虛堂生早涼遙岑吐明月天地皆秋光此時開我  
心魂肅尋常古人不可招千載徒相望

鍾曉字人雅或曰淳厓不知何許人崇禎末流寓

### 崑山以醉死

人雅混迹駟僮屢易姓名食鮮一飽而行吟不輟見巖  
牆聖粉輒以所作題壁窠書人爭惡之夏日沉飲大醉  
溺水死葉文敏公撰獨賞集錄其百篇謂風神絕俗比  
於初日芙蓉云觀海云宵宵東南無際天秦時男女漢



時船已疑徐福非方士復許孫恩是水仙  
運石漫勞隨弱羽驅山須待借長鞭  
何人汗漫乘風去花發鶯啼不  
記年春愁云虛館春愁鬢欲彫  
更緣多病暗無慘笋思  
出土猶藏甲柳學迎風漸折腰  
盡說黃金長不壞那知  
碧血最難消何須西上蘇臺望  
一笛殘陽舊六朝

夏古丹不知何許人或云越人胡姓析姓爲名往  
來吳興礪山卒葬龍興橋畔有葫蘆藏橐

古丹與吾鄉吳吳縣可黃項上舍子毗結契是亦湖海  
之士詩如春風明日動柳色上吳船晴雲一束山腰白

秋色無多樹杪紅  
非下里音也  
春草云王孫歸路不分  
朔愁積天涯到處生  
怪底女牆遮不斷  
春風吹上越王城

屠廷楫字東蒙嘉興儒學生有待旦齋詩稟

東蒙素心人  
樂天知命不戚戚  
於貧賤風誼之美可勵  
薄俗詩亦有柴桑遺響  
米蠹云之蟲在國內我亦可憐  
蟲各食天地物等使飢腹充我家八九口  
強半雜兒童  
日須五六升我計亦已豐  
恣汝所食噉黽勉必汝供但  
恐秋風來餅罄  
罍亦空我飢固常甘  
汝徙將安從  
秋邨

雜詠云背郭麗公宅秋風長薜蘿琴書存斷闕戎馬少  
經過厨欲同香積門寧直雀羅躬耕與挾策所得兩無  
多東菑收霽雨茅屋上新烟暝色林梢盡秋聲郭外先  
感時紈扇屏隨意葛巾偏坐對山花晚淒涼憶去年

毛晉初名鳳苞字子晉常熟人有野外詩卷

隱君問業於愚山及魏孝廉叔子性好儲藏祕冊中年  
自羣經十七史以及詩詞曲本唐宋金元別集稗官小  
說靡不發雕公諸海內其有功於藝苑甚鉅韻語有和  
古人詩和今人詩大約和平之音無鏤肝鋟腎之苦過

徐元歎落木菴云十年離舊榻賀九又重登山翠連郭  
合花香繞屋凝尋僧過略約呼酒洗瘦藤重覓題詩處  
苔封厚幾層移竹編籬云活竹移來帶野泥安排疎影  
與檐齊歸鴉頓失常栖處穉子難尋舊釣隄曉露潤生  
根畔草晚風吹斷隔隣雞老僧相伴逢迎少話到斜扉  
落日低

黃伋字細侯徽州人仕爲游擊

細侯畫品最高疎樹斷橋秋光滿紙宜其有不學米於  
菟之句也題畫五絕云秋霽愛登臨歷歷亭臯路不學

米於菟模糊雨中樹

蔣雯階字馭閎後更名平階字大鴻嘉善縣學生  
馭閎海士高弟力還正始未免爲格律所拘范季友邀  
飲吼山陶氏園云川原於越地風物永和時花塢陶公  
築蘭舟范叔移百年新締構一代舊招提峻閣憑霄迴  
雕闌倚石危尊髯傾北海詞賦溢南皮萬壑當牕見千  
巖向晚披拂雲歌去緩坐月酒行遲支遁情深切劉伶  
死不辭人從花底散路入夢中疑何日滄州興重來倒  
接離

褚連時字青還嘉興縣學生

青還志士邱壑不忘詩非所務崇禎宮詞一首可以嗣  
響仲初其辭云日日南薰廣殿風菱缸初進海榴紅新  
調於變時雍曲詔許中書譜殿中

程奎徽州人貢生

崇禎癸未湖廣巡撫宋一鶴敗家屬沒官有妾金陵陳  
氏以色藝聞門客王屋聘焉謝參政上選先期娶之奎  
因作詩嘲之曰歌舞叢中度歲華一朝忽去抱琵琶前  
身定是烏衣燕不入王家入謝家一時爭傳誦云

何園客字閻仙海鹽人

閻仙貧士賣畫爲活元日之作怒焉傷懷其詞云幽居  
鄰碧里淑氣轉青陽老畏今朝至貧看去日長衣裳任  
顛倒兒女異存亡誰惜頭如雪棲棲尙道傍

姚佺字仙期秀水人居於吳

仙期復社舊人以景陵流派盛行特選李何王李四家  
詩發雕以行然人罕有宗之者聞鵲一絕極其悽惋其  
詞云何事催歸鳥鈎輶喚我頻故園經戰後歸去巷無  
人昔宋南渡李御史粹伯菩薩蠻詞云杜鵑只管催歸

去知渠教我歸何處哀音亦相同也

季孟蓮字叔房無爲州人

崇禎年有刊王季重譚友夏等八家詩以行者叔房殿  
焉今之見者非訕其打油輒以之覆醬矣從斷紙中觀  
叔房聞鶯作因刪其累句存之詩云林深縱屢遷亦知  
所止處獨自語絲蠻池塘畱小住梧桐葉底風揚柳枝  
上露恣汝擲金梭如何來又去

張履祥字考父桐鄉縣學生

考父撰有楊園備忘錄其講學一以鹿洞爲師仁宅義



根言規行矩間作韻語不沿安樂窩頭巾語題屠處士  
墳邨居云霍原六聘山焦先三詔洞漁子定迷津只莫  
桃花種

董樵字亦樵萊陽縣學生

董生高蹈之士甲申後徙居文登海濱日荷蓀入市易  
米人莫知其住處縣有紳士要於路欲與語生棄薪道  
左詭云吾科頭當取冠與公揖竟去日暮不復來紳士  
取棄薪以歸曰此高士所遺也生從此不復入市其詩  
合騷揜雅惜不多傳詠懷云蘭生託層巖幽獨鮮人知

正當揚葩候所遇非其時采采桃李花乃在山之蹊豈  
不豔目前難免達士嗤珍重語國香長守貞潔姿朱明  
運徂謝金風來何早肅殺氣一變蕭蕭摧百草百草不  
自立隨風任顛倒顧瞻芙蓉花顏色轉妍好祇恐鳩舌  
鳴芳菲難遽保亦有美樅柯亭亭出物表黃塵蔽塵市  
步出西郭門悲風四而至白日爲之昏鴝鷖傍我啼虎  
豹向我蹲雖無啞人意其視眈眈然吾無太陰弓難使  
惡鳥翻我無湛盧劍莫驅猛獸奔傍徨覓歸塗雲烟隔  
通津安得貫月槎乘之入星源

王巖字築夫寶應人有白田集

築夫肆力爲古文辭要以醇樸勝若惟恐其文之工者頗有類于穆伯長柳仲塗尹師魯石守道諸家賦詩不多源本杜曲送雷伯鰲之鹽場云壯心銷欲盡流落又東行晚歲愁飢渴窮途別友生人烟依海市沙鳥汎潮聲此地藏名好渾忘世上情

李沂字子化別字艾山晚自號壺巷揚州興化縣學生有鸞嘯堂詩集

啓禎間詩家多惑于竟陵流派中州張瓠客暨弟鳧客

避寇僑居昭陽每於賓坐論詩有左祖竟陵者至張目  
批其頰是時艾山特欣然相接故昭陽詩派不墮姦聲  
皆艾山導之也送陸蕙晦云挺挺梧桐樹託根泰山岑  
良工一朝遇斲爲堂上琴我友之海上三載賞高深今  
當旋舊墟發聲爲我吟初歌漾水曲再鼓清商音四座  
忽惻悵俛仰內賞心客舍遣懷云江城畫角起高秋漸  
覺霜威冷石頭長夜河山羞短鬢故人風雨入新愁庭  
空野水蒹葭老歲晚他鄉芋栗收頗怪薄遊成汗漫朝  
朝天際有歸舟采蓮曲云蓮塘三十里四面起清風鴛

詩話卷之二十一  
言  
鷺飛不去只在藕花中

王翊字介人嘉興布衣有秋槐堂集

介人初擅詞曲後研聲詩志取多師不遺僞體其論詩于合處見離于離處求合啓禎之間大雅不作毅然以起衰自任而知者寥寥惟平湖陸職方嗣端心賞之嘗訪君子長水值君洗硯河頭挾之登舟家人不知也遍游茗雪乃返旣而入越謁陳推官卧子方置酒送客君詩行前路夕陽外行人春草中之句卧子擊節曰此今之高三十五也爲序其詩詞遭亂所居不戒於火惟餘

小屋二間一供婦爨一吟咏其中有故人官府寮者造  
之不見尋卒于京口五言如江湖長至日風雪上方山  
驛路通秦遠峰陰入晉多枕榔千樹雨瘴霧百蠻天日  
氣淫秋雨嵐光變夕曛楓林依水盡雲物近秋多一二  
故人在飄零佳訊稀江山雄白下人物近黃初山雪行  
人少江梅臘月多文章身後事邱隴夢中山白社違人  
日兀關閉子雲江山開一望吳越在孤舟七言如夜月  
旌旗五馬渡秋風草木八公山周道秋風行黍稷漢宮  
春雨長蒲桃西蜀喻通司馬檄中山謗滿樂羊書秦塞

忽驚三月火漢家空待貳師功三月晴風高戰鼓九江  
春水下樓船鑄語高華此方虛谷所云律髓是也

附錄沈山子云介人所居止破屋一間種牽牛小庭  
中曉露未晞卽對花吟詠日課數詩旁精詞曲有紅  
情言榴巾怨詞苑春秋博浪沙諸傳奇頗慨忼自喜  
遺橐多逸僅存百一而已登臺云日暮登臺秋風鴈  
來慨然念遠離居與懷躊躇千里靜言勞思爰有旨  
酒斟之酌之拔劍高歌哀音孔多沉吟忽斷中心奈  
何繁星告夕薄寒求衣明月不墮輕霜自飛稽山之

東大海處之衆水所歸曾不盈而逶迤今古山川屢  
更嗚呼往者實多于生宿董氏宛委山房云中夜虎  
渡水溪樹初風生颯颯吹哀湍衆山皆有聲深庭久  
無月黯然三四星憂人獨求醉釋此離居情牧牛詞  
云二月三月春雨晴渚田水暖芹芽生牧童驅牛出  
原隰細草青青牛可食夕陽短笛不見人吹過邨南  
又邨北靜夜思云虛帳含秋月高樓怨別情明河一  
萬里夜靜水無聲江臯曲云爲愛新粧好東臯出采  
蘋春江千里色解珮不逢人會稽竹枝詞云秋風秋



雨正淒淒荷葉荷花香滿溪越女蕩舟愁日暮歌聲

盡在若耶西楊柳枝詞云春寒殘雨日瀟瀟一曲驪

歌上灞橋想到啼鳥今夜宿不教攀折最長條送客

還山右云春草太行山人一騎還夕陽前路遠離

夢索居閑鳳舉今誰匹鴻歸不可攀所悲流水意千

里送潺湲邨居云獨樹寒烟外孤邨流水間偶隨花

草去遠逐漁樵還川暝罷垂釣日斜長掩關何年事

高隱歸卧鹿門山客中九日云細雨成陰近夕陽湖

邊飛閣照寒塘黃花應笑關山客每歲登高只異鄉

漂母祠云一飯當年報所知王孫今日更何之平生  
自歎無知己千里來尋漂母祠

夏錫祚字元寵別字書樓大洲人補崑山縣學生  
有雪鴻堂詩草

書巖五古居然作家自紫峴澗至旋螺頂云荒蹊渺人  
蹤樵路僅可辨忽焉耳官清泉聲泠然善入谷山四合  
仰視天一綫陰陰冷翠滴竹色綠人面泉行如秋蛇赴  
壑隨所轉迴磴或阨之怒歎亦飛濺偃木傍石梁渡客  
攀援便故令坦塗隱不使門扉見路窮出階堦曲折趨

古殿苔衣鹿胎斑亂點落梅片巖阿架精廬清閔獨所  
擅幽意領已永奇勝探未徧復尋來時路一步一纏纏  
夕陽照歸人紛紛下華甸度風篁嶺至龍井云不知何  
年代人家猶太古叢篁高百尺深密掩邨塢寥寂絕人  
聲濃綠滴環堵徑轉下坡陀丁丁響樵斧道旁萬松樹  
落落清可數叩門墮山翠竹裏僧開戶呼童汲新泉泉  
自石穴吐烹以瀹茗牙炒焙初出釜客言香色絕僧意  
不自詡乍與佳勝辭迴顧失紺宇樹密天疑陰泉吼聲  
帶雨忽聞遠邨雞有路出漁浦

顧卣字琢公一字山臣錢塘人有今年草

山臣工繆篆詩不爲格律所縛持論亦復不羈家居奇  
窘有桑門勸其修行以資來世福山臣笑曰不知前身  
是何雞狗作之孽使我今生窮苦若從上人修行又不  
知來世是何雞狗安享是福聞者以爲笑端然正可發  
愚夫愚婦深省也江皐云江皐有梅梅有枝青樓悅君  
君不知水郭舟喧趁潮去月落沙禽啼滿樹夜思云疎  
雨乍過菡萏陂好風微動楊柳枝前溪後溪棹歌歇夜

半水明飛鷺鷺

陳道永字非元更名確字乾初海寧學生

先生難經鏗鏗詩不求工然亦流暢東董子云春風亭  
子雨迷離旅思紛紛憶舊知別去好山游幾處倦歸蕭  
寺記何時期君南閣尊前話看我西湖隄上詩莫謂兩  
人容易見滿頭白髮已如絲

蔣之翹字楚穉秀水布衣甲申後隱于市

楚穉居射襄城詳對楚辭晉書韓柳文集鏤板以行又  
輯樵李詩乘四十卷搜錄鄉黨先正詩無遺兼能備舉  
軼事使聽者忘倦晚年無子書籍散佚無餘詩乘亦亡

可歎也

沈自昌字君克吳江人禮部主事琦子國子監生  
沈自然字君服吳江人副使琬子居母憂不勝喪  
而卒其友私諡孝介先生有來思閒情二集

沈自徵字君庸吳江人亦副使琬子辟賢良方正  
不就

沈氏多才自詞隱生璟訂正九宮譜爲審音者所宗而  
君庸亦善填詞所撰鞭歌伎灞亭秋諸雜劇慨當以慷  
世有續錄鬼簿者當目之爲第一流詩則嫌其稍平衍

也君克客夜聞笛云爲夢西洲蚤閉門高樓橫笛正黃  
昏關山風月愁清夜楊柳梅花憶故園波起湘江飛落  
葉雨淋蜀道叫哀猿沙場多少征人淚一曲吹來欲斷  
魂君服曉別曲云月沒星闌曉雞唱離人催起同心帳  
殘膏無燄淚花紅不語含顰兩相向安得紅輪葬海底  
千年長伴多情死從此人間無別離門前不種相思子  
寄居湖上樓云藕葉將凋桂葉濃隔湖隱隱見雷峰獨  
松關口秋聲急并入南屏寺裏鐘君庸和施壘山學博  
送別云苜蓿關干春漸肥榆關滇海雁書稀管城亦有

封侯骨磨盾看君試短衣

屠爨字開伯嘉興縣學生有曷齋集

聞伯言無枝葉行有規矩詩亦雅正不以風華見長古  
意云素絲非一絲機中織成帛卷舒生容光從郎自搖  
襞慎勿染爲緇終身不見白贈別袁重其云高飛鴻雁  
滿關河此日寒江起夕波庾信哀時常作客梁鴻去國  
獨行歌霜淒茂苑清砧急月照荒臺落葉多爲問吳中  
舊知己空山叢桂近如何

孫治字宇台仁和縣學生有集



宇台刻意摹古寧質不佻渡漳云河北臨大水清漳還  
濁漳草迷銅雀綠沙走直沽黃疲馬愁荒渡飛鳥逐野  
檣比來憂汎濫何計築渠塘與關六鈐云故人栖託近  
如何聞道元亭自詠歌梅福游吳辭宦久虞卿去趙著  
書多秋風絕塞來鴻鴈白露寒塘遍菱荷君意陸沉堪  
寄傲獨慚年歲轉蹉跎

馮班字定遠常熟人有鈍吟集

啓禎詩人善言風懷者莫若金沙王次回定遠稍後出  
分鑣並驅次回以律勝定遠以絕句見長大都次回全

學溫李而定遠多師其源出于才調集也游仙詩云書  
邀女伴看桃花三鳥回時滿地震記得明朝是丁卯青  
童又合上東華紅桂開時試舞腰素娥爭換白鮫綃歸  
來更按鈞天曲吹裂真妃碧玉簫貪看對奕不歸家誰  
折當門玉樹花特勅雷公往追取半空鞭下阿香車玉  
洞桃花又爛開等閒相望隔塵埃劉郎也似山中水一  
到人間便不回雨霽云溪水溶溶拍野橋薄雲開日露  
林梢不知一夜前邨雨多少春泥上燕巢

重說字若雨烏程人晚爲僧名南潛字寶雲有豐

草菴等十八集

若雨腹筍便便未免有才多之恨至其硬語澀體絕不  
猶人方諸涪翁不足比于饒德操有餘南邨秋鬼謠云  
妖狐拜月霜花青鬪驪騎馬空中行秋魂吹作塔鈴語  
叫斷東流一溪水鬼車曉喚精靈去綠燈移過江楓樹  
春日云煮茶烟透綠陰中遮屋黃茅間瓦松但遣異書  
供研北不妨野語聽齊東香拈細雨招新夢門閉春風  
仗短童秋色今年應更好小牕移得碧梧桐夢華潭口  
聽客話嘉隆間大內舊事云月華門外轉靈旗照夜銀

盤碧藕肥祠罷天孫桐葉落君王新賜鵲橋衣江南風  
景藥王灣霧縠單衣綠玉環紅芍藥邊碁局罷自裁團  
扇畫秋山

朱扉字開仲嘉興布衣

開仲弱齡多病終其身不婚獨處深邨破甑勞薪手自  
執爨間賦小詩不輕示人簡吳生一律與會自如其詩  
云自誦梅花人日詩五句不見但相思一春多雨愁無  
麥二月輸官定賣絲行藥橋東逢客返著書牕下少人  
知近傳孺子司邨社想見麤豪割肉時

程用楫字濟臣休寧人有遜敏居遺草

濟臣詩清真堅老卓然名家雨宿桃源菴云夕雨四山  
來奔灑萬松裏卧聞藥銚泉激激聲不止道人然松膏  
中夜更坐起何處一燈青明滅深壑底曉看白龍潭應  
添數尺水月夜宿慈光寺小閣云暝色起平坡鐘聲滿  
山戶一禽忽驚聒涼月已復吐牕櫺色如水松葉紛可  
數樹底坐白猿鬚髯極清古喝石居云石室雲正暮溪  
流聲更長嬾殘何處去虎跡滿繩牀下食白鷗靜侵階  
紅朮香無人指歸徑獨自立殘陽

張鹿徵字瑤星後更名怡亦作遺應天人都督可  
大子以府學生承廕歷錦衣衛正千戶甲申陷  
賊不屈受刑潔身歸隱居攝山不出自號白雲  
道者有古鏡菴詩內外集

山人生時園中鹿亦產子因名鹿徵而以瑤星爲字崇  
禎間曾仕錦衣故其六十初度詩云當年執戟侍明光  
親見彤雲捧玉皇也山居鈔書頗多著述甚富予所見  
者僅玉光劍氣集謏聞正續筆數種而已曩造其山居  
見案頭有手抄宋季張炎叔夏詩集一卷今其遺書不

可復問詩亦流傳者寡矣友人移居云居市厭市囂入  
山苦山僻非山非市間卜茲五畝宅到門水一灣眠沙  
鶴一隻遙望鐘阜巔雲霞幻朝夕乍見雨脚沉忽焉晴  
絮襲主人如冥鴻高舉不可弋邱壑盪心胸花竹恣夷  
憚何時載酒過爲君理雙屐雜詩云淺水平沙路淪漣  
繞一邨夢回天地老亂後友朋存芳草生幽澗新鶯語  
小園看山廣武後久不望中原

戴冠字我仲一名易字南枝紹興山陰人有釣臺

詩集

我仲高人與徐孝廉昭法結物外之契嘗賦釣臺詩累  
百首託以見志哀而成集覽之未免牽率友人續示集  
外詩四首錄其一云已分垂綸老此生山田是處可躬  
耕遠攜仙女全家隱深梅羊裘大澤行一夜星辰凌帝  
座九重貴賤見交情請看七里瀧中水未到錢塘徹底  
清

杜濬字于皇號茶村黃岡人有變雅堂詩集

啓頑之間楚風無不效法公安景陵者于皇獨以杜陵  
爲師是亦豪傑之士惜其阨窮以老孟貞曜所云好詩



多抱山也登金山塔云極目非無岼滄波接大荒人烟  
沙鳥白春色嶺雲黃出世登初地思家傍戰場咄哉天  
咫尺消息轉茫茫薄暮難爲狀空中別有聞懸燈江海  
合望月水天分寥廓身何往飄零興不羣向來峰頂色  
看作下方雲菱湄舟中偶成云一雨連三月開帆趁晚  
晴春風吹岼草知是石頭城臘盡還冶城口號云淮水  
凍仍綠鍾山燒更青一椽來復去只似短長亭妻孥誤  
見嗔我信如潮汐出門必上元還家必除夕

方文字爾止桐城人有畚山集

長多盜荒邨亦駐兵昇平何日事把酒壯心驚

楊炤字明遠先世清江人移家長洲補縣學生有

懷古堂詩選

明遠詩評者比之雪山醍醐吾嫌其太滑長蕩春汎云  
春心不自抑率意爲歡賞旣洽尋山興復生涉江想恰  
當風日佳悠然進蘭漿綠楊映垂垂黃鸝鳴兩兩此時  
盡一尊浩歌激清響遙望秦餘山開懷對西爽斜陽半  
邨戶遠岫挂漁網透迤出前浦蒼蒼月初上

顧超字子超吳縣人

韓高士洽有明詩存選本其最心折者子超之長歌大  
約兼仿溫飛卿李長吉而神明之惜其全稟求之不得  
吳徵士景果偶得鈔本錄其五詩當崇禎之際吳俗談  
詩者多惑於楚人之咻以空疎蕭寂相尙若子超之出  
入經籍卓然羣雅之遺

又云鄭駙馬冢在洞庭山駙馬生女示疾不嫁舍身爲  
尼葬于山中子超一律云自湔金粉割紅絲桃杏無顏  
五百年晉日尼師皈白佛唐家貴主事金仙春寒宿草  
猶迷蜨露濯空桑欲化蟬幾處禁煙人涕淚玉棺風雨

但聞鶻案釋寶唱比牛尼傳晉土比邱尼自洛陽竹林  
寺淨檢始唐會要睿宗第八女金仙公主入道蜨用韓  
馮事蟬用齊女事用古却似玉溪生

周質初名筠字青士別字營谷嘉興布衣有采山

### 堂集

青士遭亂棄舉子業受廛賣米有括故家遺書連船鬻  
於市者買得一船積樓下每日中交易筐筥斗斛權衡  
堆滿肆讀之糠粃中其爲詩句數字琢不輕襲前人片  
語胸無柴棘急人患難視朋友如一身人或忘大德而

思小怨者不以真諸懷也晚年詩趨率易好與浮屠道士游題咏極多嘗醉書五言云似士不游庠似農曾讀書似工不操作似商謝奔趨立言頗突兀應事還猶疎飢凍不少顧吟詩作歡娛可當一幅寫照也

又云宋周文璞方泉集有姜堯章金銅佛塏歌云白石招我入書齋使我速禮金塗塏我疑此塏非世有白石云是錢王禁中物上作如來捨身相飢鷹餓虎紛相向拈起靈山受記時龍天帝釋應惆悵形模遠自流沙至鑄出今回更精緻錢王納土歸京師流落多在西湖寺

錢王本是英雄人白蓮花現國主身蛇鄉虎落狗脚朕  
何如紅袍玉帶稱功臣天封圻開卽退聽兩浙不聞笳  
鼓競歸來佛子作護持太師尙父中書令一枚傳到白  
石生生今但有能詩聲同袍秦外銛師兄哦詩禮壇作  
佛事同喫地爐山芋羹何會熏陸綺牀供但見相輪銅  
綠明哦詩禮壇猶未畢蘆葉低飛山雨溼曹勛松隱集  
有淨慈創塑五百羅漢記略云淨慈山光孝禪寺錢氏  
時曰永明寺慈化定慧師道潛居之嘗請於忠懿王求  
塔下金銅羅漢像會王夢十六大士從師而行密符其

請因如所求歸於精舍是當時銅塔率歸淨慈矣近吾  
友青士忽於嘉禾白蓮僧寺見之別是一片乃鑄放下  
屠刀立地成佛故事係蔣處士岍僧果所施今訪之寺  
僧堅不肯承矣青士過白蓮寺觀銅塔云銅塔如片瓦  
鎔鑄何工巧隆起欄楯形圖識尙可了知是五代物厥  
惟錢王造是類萬有千聚散不可保幾歷兵火災存者  
今已少蔣生偶獲之什襲逾重寶施舍鎮精廬此意實  
微眇誦公喜我至出示光尚皎漙處填黃金顯見譚相  
好屠兒額偏廣下放刀仗小一者既若斯諸餘皆可曉

自注云塔是錢鏐時故物蔣子檣果得之施鎮此寺

繆永謀一名泳字天自又字于野嘉興縣學生有

荇谿集

天自韶年深懲公安景陵流派一以蕭統徐陵所選及  
左克明郭茂倩之書規模傳習及周覽四方風氣雖殊  
終不改度可謂有君子之守者述懷云幽居抱長懷恒  
苦無近虞翹首百年內不足當踟躕吾黨二三子頗言  
心相孚振策無駑駕懸乘皆驪珠結帶從行游風波忽  
相渝失路須臾間不復同馳驅聞道初未深託俗非良



圖安知阮生涕乃爾雪窮途擬古云步出城東隅言登  
北邙阪纍纍誰家墳淒淒白日晚斷碣時復存披榛陟  
重巘問之何代人去我亦已遠抔土一朝封千年不復  
返造化相推移須臾成聚散晝夜理亦齊賢豪終不免  
彭殤皆有盡寧復論修短笑歌誰與娛當杯勿辭滿嚴  
霜下林薄野雀鳴啾啾念彼客游子舉袂風修修我有  
尺一書欲寄終無由揭來入我夢歡言結綢繆遺我紫  
羅襦被以青綺裘欲語未及竟行矣安能留展轉不成  
寐垂涕沾衾裯相思越萬里荏苒淹三秋願保歲寒心

區區復何求

陳恭尹字元孝廣州順德人有獨漉堂集

元孝降志辱身終當進之逸民之列其自序略云志學  
以往皆爲患難之日東西南北不能多挾書卷自隨而  
意有所感復不能已於言故於文辭取諸胸臆者爲多  
而稽古之力不及其辭可云不自滿矣羅浮蝴蝶歌送  
友云羅浮大蝴蝶言是小鳳凰六足盤胸間四翅交文  
章修眉若楊葉繡腹如垂囊仙人愛文采挾之游帝旁  
雲霞爲友朋沉澹爲酒漿倦息珠闕上飢采若木英四

海安足飛來下君子堂堂中有行子比德共翱翔石湖  
觀梅花同諸子分賦得動字呈羅仲恭羅顯哉兼懷湖  
主人羅澹峰云溪西千樹當時種數尺枝條柔可弄不  
踏湖隄向一年已覺繁花密無縫經過昨日此忽忽兩  
夕幽懷不堪誦栽花主人隔千里花下扁舟與誰共虬  
髯逸興迴不羣公子翩翩復殊衆折簡相招到石牀新  
醅不惜開銀甕遠方英俊兼秦越滿座雄談雜嘲諷是  
時霜後積水清湖西滉瀟波光動四山開朗有佳色孤  
嶼蕭疎欲含凍共誇密雪賦梁園復訝行雲入荆夢幽

光漠漠去岸高素色鱗鱗壓枝重拂衣屢愛輕瓣飛行  
杯更遣濃香送逆風十里氣尙滿沿流百步溪猶壅高  
天可厭白日墜厨人未報清尊空老夫短檝欲早歸上  
客班騅亦停鞚開牋意思已潦倒下筆詞章乃狂縱寄  
謝梅花勿笑人繇來韻險難爲用鄴中懷古云山河百  
戰鼎終分歎息漳南日暮雲亂世姦雄空復爾一家詞  
賦最憐君銅臺未散吹笙伎石馬先傳出水文七十二  
墳秋草徧更無人表漢將軍隋宮懷古云穀洛通淮日  
夜流渚荷宮樹不曾秋十年士女河邊骨一笑君王鏡

裡頭月下虹蛻生水殿天中絲管在迷樓繁華往事邇  
溝外風起楊花無那愁送姜山上人游南岳云送師西  
去重低徊會上衡山絕頂來夏帝碑蕪蟲篆遍楚天峰  
斷鴈行迴燈前鬼芋穿沙出霽後僧門鑿雪開正是到  
時三二月上方明月下方雷

徐開任字季重崑山人有愚谷詩藁

季重咏史云新都居攝時符瑞日盈耳不有翟將軍人  
心俱已死移檄建義旗威名震遐邇時命雖不成稱兵  
從此始悲哉兩黃鵠無人郵義士送人遊下邳云江南

春色不勝情俠士辭家事遠征天下侯王寧有種世間  
豎子遂成名故交亂後無同志羈客愁時有定盟豪氣  
未除淮海習知君此去慰平生朱長孺謂其詩原本少  
陵深情至性激發而出使讀之者流連往復而不能自  
已

朱茂曙字子蘅天啟初補秀水學生甲申後棄去  
既卒鄉人私諡安度先生有春草堂遺藁

本生考安度府君早歲以文受知于吳范君文若既而  
侯官曹公學佺鄭公瑄崑山顧公錫疇鎮海何公楷上

虞倪公元璐崇德吳公之屏交相賞激暇寫山水作行  
楷書董尙書其昌見而歎曰不出十年子當亂吾真矣  
家貧無析產崇禎中歲饑飛蝗蔽天人相食先妣唐孺  
人率兩姊刺繡衣裘易米日趨乃炊府君絕無憂色奕  
譜畫鑑覆局開圖不改其樂也遭亂盜劫者再青氈盡  
失凡九遷而定居長水敝衣破帽口不談天下事惟與  
里中耆老枯棋一局濁醪數杯以消暇日詩不多作作  
亦摧燒之不復存也故所錄止此

又云嘗咏牽牛花云金鷗初動露華滋最愛娟娟竹尾

垂多少紅閨昏夢裏不知秋色到疎籬周青士言梅都  
官咏牽牛花云花蔓相連延星宿光未收采之亦何早  
日出顏色休蔣勝欲曉行詞云月有微黃籬無影挂牽  
牛數朶青花小蓋此花日出卽萎晏起者不及觀也先  
生多少紅樓二語寫出花神在風露中可爲絕唱

附錄魏冰叔云先生弱冠日就婚京師時太傅文恪  
公在位日侍履絢獲聞中朝掌故中歲游學雷都譚  
禮部元孩引以相助博稽舊典撰兩京求舊錄一編  
遇亂避地栖真寺南盜至舫篋失去尋移潛城之西



轉徙新塍塘北沈上舍駕推宅東北隅霽容閣以居  
抄撮韓詩內外傳章句以授門弟子生平不喜作韻  
語偶然成絕句小詩輒工妙予嘗過長水拜先生墓  
覽汪戶部所爲志銘於先生撰述削而不書爰補綴  
其略

朱茂曜字子蕃天啓中補嘉興府學生承蔭入國  
子監有惟木散人藁

先叔行第六孳孳爲善惟日不足舍其田以瘞無主之  
骨崇禎辛巳餓孳滿野先叔屬納心上人藁葬不下數

于又屬止觀上人收孩提之童于路爲粥香花橋僧院  
所活又千餘人焦烟赤日中奔走不暇晚栖心禪悅謂  
人世大夢錄古今史傳及所見聞凡夢兆之可徵者號  
微夢錄不啻二百卷暇則賦六言詩積累千百沒後遺  
藁悉亡可歎也生平嫉惡甚嚴而工于詆譖嘗客揚州  
有通門仕宦名在逆案者來見拒之繼以廩粟庖肉取  
而納諸寺中所寄空棺爲文生祭之州人傳以爲笑有  
新貴人語其客云人家子弟不可不令讀莊子只如養  
生生一篇文已絕妙先叔從旁日以言莊子不若逍遙

遙更佳坐客皆爲齒冷然胸無城府同里施處士博嘗  
歎曰遇子蕃于道覺滿街皆聖人

朱茂皖字子芾號芾園崇禎初補嘉興縣學生棄  
去教授鄉里有顯頌集

先叔父芾園先生行第八少補學官弟子遠浮名務實  
學先大父守楚雄萬里從行繼又隨從祖思恩守由楚  
入粵周覽西南山水之勝所至以詩筆自娛及嘉興城  
破避兵夏墓蕩之北有故人邱岳託其子於先生而浮  
海入粵轉徙閩廣以死先生視岳之子如己子爲之娶

婦教以學文居室三楹書籍盈罇鹽豉蔬果雜置几案  
客過或自執爨集中詩所云三十卽悼亡所苦米鹽并  
有時賓客至手自調吳羹是也村居恒附載赤馬船入  
市市僧或昂物價以相誑者先生輒如數給之其後市  
人相謂曰此長者不可欺咸平其值交易焉先後授徒  
三十餘載弟子著錄者百人彝尊亦從受業崇禎之季  
文尚浮華駢儷先生獨賞嘉定黃蘊生文以彙相授旣  
而語彝尊曰河北盜賊中朝朋黨亂將成矣何以時文  
爲不如舍之學古乃授以周官禮春秋左氏傳楚詞文

選丹元子步天歌人皆笑以爲迂俄而亂不可遏矣先生詩質實象其爲人病齒詩云十年化離身蒲柳零秋節上斷左右齒或脫或杌隉豈惟廢嘯歌將欲屏麴蘖安得逢真人授我華池訣頓令危者安粲然復駢潔乾肉及軟骨入脣便翦截免效昌黎翁落勢崩山埒

朱茂暘字子蓉秀水縣學生有鏡雲亭集

明之詩家學杜者多學李者少學李絕句者多學李古風者少第十五叔父雖曾選中晚唐人詩以行然心慕手追專師謫仙人者論者謂先叔古風蕭蕭瑟瑟譬諸

華流東注河漸西來伏流過峽終難得其溶發之地或  
又比諸出水芙蓉天然去其雕飾其爲大雅所推挹若  
是山鷓鴣詞云南北安所習風土各有宜如何鷓鴣鳥  
翻向燕山飛燕山苦寒地雨雪長霏霏蒼鵝居洛陽軀  
體笑汝微胡雁自矯翼豈復銜汝歸曠然中野間日暮  
將何依